

DEN AMBIENTE....

Fotos y Texto: Jan Poets

Un biaha mas First National Bank ta patrocina... ARUBA'S OFFICIAL 2001 CARNIVAL JINGLE..

** Ayera na e edificio nobo di First National Bank situa awor na Sasaki, a tuma lugar e acto di bautiso di "Aruba's Official 2001 Carnival Jingle", cual produccion ta ser patrocina pa First National Bank of Aruba. E acto di bautiso a ser transmiti enbibo pa Canal 90 Fm, durante e popular programa carnavalesco "Aki Aya" cu ta ser presenta pa Ruben "Scorpio" Garcia, kende for di 17 aña pasa a bin cu e bunita iniciativa aki. Tur aña Scorpio como e productor, ta escohe un elenco artistico concidera como esnan mas renombra di nos pais, pa asina produci e jingle carnavalesco riba un nivel y calidad halto. E biaha aki a toca turno pa Parlamentario Edwin Abath resona su voz riba e jingle, kende porcierto 17 aña pasa tabata e prome cantante.. E demas elenco cu a produci e jingle carnavalesco aki ta: Eddie Samson y Franklin Granadillo como e areglistanan, mientras G-Force a realiza e composicion y como background vocals, Olga Antonette, Eddie Samson y Edwin Abath. E grabacion a tuma lugar den Absolute Music Studio y imprimi na Quick Disc Aruba. Aruba ata bo jingle carnavalesco...."47...Heee yen di Pikete..Hee....Cashupete!!!



** E momento cu e Jingle Carnavalesco 47, ta ser bautisa cu cashupete den presencia di Edilienne Stenebome Reina Infantil Carnival 46, Hubert Riverio Mr. Carnival 47 y Micky Gravenhorst, kende porcierto a bin cu e idea pa bautisa e jingle den e forma aki...



** Riba portada di e CD Jingle, ta aparece foto di Abigail v/d Linden, Reina Juvenil Carnival 46..



** Edwin Abath, 17 aña pasa tabata e prome cantante pa graba e jingle y awor ta ricibi e honor pa bolbe resona su voz riba e tradicional jingle carnavalesco. E tempo ey, Edwin Abath tabata un di e cantantenan mas aclama di nos pais. E biaha aki sin duda ta un gran honor pa Edwin Abath realiza e grabacion como Parlamentario, cual ocasion E ta marcando historia como e prome y unico Parlamentario pa graba un jingle carnavalesco..



** E aña aki First National Bank of Aruba ta marca su di 10 aña consecutivo como patrocinador di "Aruba's Official Carnival Jingle". Aki por aprecia e momento cu e dinamico gerente di First, sr. Edwin Tromp, den pleno entrevista cu Scorpio durante e programa "Aki Aya"..



** E acto di bautiso a conta cu presencia di sr. Eddie Samson (areglista), Parlamentario sr. Edwin Abath (cantante), sr. Edwin Tromp Gerente First National Bank, sr. Ruben "Scorpio" Garcia, sr. Hubert Rivero (Mr. Carnival 2001), srta. Chastity Hodge (Reina Carnaval 47), sra. Elsa Westerburger (Mrs. Carnival 2001), sr. Milo Croes (Presidente S.A.C.), Edilienne Stenebome (Reina Infantil Carnival 46) y tambe Prinsnan y Panchonan juvenil y grandi 2001...